

## ROJANKINATZINIRI PAAWORO KOROJAASHIJATZI

---

**1** <sup>1-2</sup> {Eeniromi, noyemijantzinkarite, maawaeni aapatziyariri Jesokirishito janta Korojaashikinta? Naaka Paaworo nojankinatzimiro. Naaka Rotyaantanewo Jesokirishito, rootaki nokenkithatakanantzimiri, rootaki ikowakaakinari Tajorentsii. Notsipatakarai jaka ayemijantzinkarite Temoteeyo. Nojankinatzimiro maawaeni aapatziyaperotariri Tajorentsii jaga pinampiki. Nokowaki ineshironkatapiintemi eejatzi riweshiryakayemi Pawa Tajorentsii, eejatzi riori Awinkatharite Jesokirishito.

### Ipaasonkitakowentziri Paaworo korojaashijatzi

<sup>3-5</sup> Paerani pikemakironi iñaani Jesoshi paapatziyakawo, rootaki pawijakontari. Kyaaryo iroka pikemakiri. Eejatzi piyoteeyawakironi kameetha ijekakayemi riraga Tajorentsii janta jenokinta. Rootaki paapatziyantaperotakariri Awinkatharite, eejatzi osheki pineshironkaperotziri maawaeni ayemijantzinkarite. Nokemakotakimi, rootaki maawaeni kitejiri namanantapiintariri Tajorentsii, nokantapiintziri imatakaapiintemiro kameethatatsiri, eejatzi noñaaperotziri Tajorentsii, riraga ashitariri Awinkatharite Jesokirishito. Eerokateeyakini

nopaasonkitakowentziri. <sup>6</sup>Pikemakiro iyaatakotayitanakini iñaani Tajorentsii maawaeni nampitsikipaeni. Raapatziyeeyakarini Jesokirishito oshekini riroripaeni. Pikemantakawori eerori, piyotaperotawakiro kyaaryo ineshironkatake riraga Tajorentsii. Paapatziyawakawo rootaki kaari pikimitanta paerani, omaanta eekiro, eekiro piyotakiro pantero ikowakiri riori. Eejatzi ikimitakimi paashinipaeni kemaperotakirori ipaashiniperoteeyeeni. <sup>7</sup>Rioma Epaajagashi rirotaki kenkithataakimirini paerani. Ikimitana, ikantani ikyaryooowentziniri Jesokirishito. Kameetha ikyaryooowentziniri, rootaki notyaanantariri ikenkithatakaantaytakimirini. <sup>8</sup>Ikamantapaakina omatakaakimiro Ishire Tajorentsii, rootaki pineshironkaperotantakariri paashinipaeni atziri.

<sup>9</sup>Rootaki namanapiintariri Tajorentsii: “Pimatakayeri pikowakaakiriri maawaeni noyemijantzinkarite janta Korojaashiki”.

Roojatzi nokantani nokantapiintziri Tajorentsii: “Piyotakayeri korojaashijatzi maawaeni pikowakaakiriri kameetha raapatziyantaperotemiro”. Eejatzi nokantziri: “Nokowaki Pishire iyotaape-roteri maawaeni, iyotakaaperoteri, kameetha ikemantaperotyaawori

pikantziri".<sup>10</sup>Eejatzi nokantziri imatakayemiro apatziro pikenkithashiryaapiintero pantero kameethatatsiri, piweshiryaaakaaperotantyaariri, eejatzi panantyaawori maawaeni kameethatatsiri. Riroma rirotaki Awinkatharite, rootaki okameethatantari anteniri iroka, iñaaperotanteeri. Nokantziri imatakayemiro apatziro pantero kameethatatsiri, rootaki imatakayemiro piyotantyaariri, eekiro, eekiro piyoperoteri.<sup>11</sup>Riroma rirotaki Tajorentsipero, ikameethaperotaki, imataperotero oetarika ikoyiri, rootaki nokanantariri imatakanterimori pimatantapiintyaawori maawaeni kameethatatsiri, eero pijamashiryawo inta pikimoshirewentanakiri Tajorentsi. Rooma aririka rowashironkaawitemi atziri, rirotaki matakayemironi Tajorentsi eero pipiyatantari pikijiri.<sup>12</sup>Rooma rirotaki owameethatakaeri, riwetsikashiryaakae aatantyaari janta ikashiyaakaakaenta. Rooma ari akaateeyapaakirini maawaeni ayemijantzinkarite janta okitejiperotzinta, kameethaajeekapae. Rootaki akanantakariri Tajorentsi: "Ariwee, Pawa".

#### Ikenkithatakotakiri Jesokirishito

<sup>13</sup>Paerani reewawenantawitakaerini iwinkatharite kamaaripaeni rootaki akimitantawitakaririni ajeekawitani janta otsitemiperotzinta. Omaanta rowawijaakotakae Tajorentsi, rootaki iroñaaka reewawenantakaeri Itomi, riraga inintaperotanewo rirori.<sup>14</sup>Ikamawentakae riraga Itomi, rapaatawentakae riraa rowawijaakotantakaeri. Ineshironkaperotakae Iriri, iroñaaka eero ikenkithashiryaakoteero kaari kameethatatsi antawitakari paerani.

<sup>15</sup>Kaari ikonaanitzi Pawa Tajorentsi, omaanta ipokapaaki jaawikika Itomi, ikonaatapaaki kipatsikika, rantaritapaaki jaka. Omaanta ikimitaperotari Ashitariri.

Tekirani ojeekini kipatsi eejatzi maawaeni oetarikapaeni añaayitzirini, ari ijeekitani jantajenokinta rirori.<sup>16</sup>Rirotaki wetsikakiriri maawaeni:jenokijatzi, kipatsijatzi, koñaatatsiri, kaari koñaatatsi, maawaeni. Aritaki riwetsikakiriri maawaeni rinashitayitakanironaampiri Tajorentsi. Rirotaki Jesokirishito wetsikakiriri maawaeni. Tee riwetsikashitari, inta riwetsikantayitakaririni maawaeni iñaaperoteri.<sup>17</sup>Rirotaki Jesokirishito itaperotakaworikya ijekitani paerani. Ikantakiri maawaeni riwetsikani: "Aritaki pikanteeyaani".<sup>18</sup>Rirotaki Jesokirishito iyoperotatsiri reewatawenta-kae aaka, eejatzi maawaeni paashinipaeni aapatziyariri. Tekatsimi rirori, eeromi ayotzirimti Tajorentsi, eeromi aapatziyarimi, eeromi awijakoteemi. Ipiriinteeri Itomi riraga Tajorentsi paerani, eero ikamae eejatzi. Rirotaki Jesoshi itakawori ipiriinta. Riro impaetatsini kaminkari ipiriintee aririka omonkaatapaakya ipokantaatyari Jesoshi jaka kipatsiki. Kyaaryo ipinkathari-perowenantziroña maawaeni,<sup>19</sup>itajorentsi-perotakiroña. Rootaki ikowakaakiriri Ashitariri.<sup>20</sup>Paerani eenitatsini kaari kameethatatsi rantawitarini maawaeni atziri, rootaki kaari riweshiryaaantawita riraga Tajorentsi, omaanta rotyaatantakirii Itomi ikamawentakae koroshiki, rapaatawentakae riraa. Icamawenantakaera kameetha atsipantanteeyaariri rirori, rootaki roemoshirenkantakaeri. Rowameethatake eejatzi ikoyi rowameethateri maawaeni kipatsijatzi eejatzijenokijatzi. Iroñaaka iñaaperotakae akameethatzi, eejatzi añaaperoteri rirori.

#### Ikenkithatakoteri korojaashijatzi

<sup>21</sup>Ari, paerani tee pikenkithashiryaapiintzirini Tajorentsi, pikijawitarini. Pikenkithashiryaawitawoni kaari kameethatatsi, eejatzi pantapiintawitawoni.<sup>22</sup>Omaanta ipokapaaki Jesokirishito kipatsikika, ikonaatapaaki ikimita-

kotawitapaakae aaka. Roojatzi ikamawentakae koroshiki rowameethantakaeri, rootaki iroñaaka piñaaperotantariri Tajorentsi ikameethatzi, eejatzi iñaakimi eerori pikameethaperotaki, ikimitakaantakimi tee pantziro kaari kameethatatsi.<sup>23</sup> Omaanta ikowaki akantatyeyaaani aapatziyawo iñaani. Eekiro aatatye aapatziyaperotanakyaawo. Piyotaperote kyaaryoopero atsipataperotyaari Tajorentsi paatajenokinta. Eero pipakayiro paapatziyawo iñaani. Ñaakiro, othotyaaka okamantakotaka iñaani Tajorentsi maawaeni nampitsiki. Eejatzi naari nokenkithatakotakiro, notsipatakari paashinipaeni kenkithatakaanantatsi.

**Riyoteeri Paaworo kaari  
riyotawitani paerani**

<sup>24</sup> Osheki ikemaatsitakawo Jesokirishito rowawijaakotantakariri maawaeni aapatziyariri, iroñaaka ikimitakaantakae aaka inampijatzipero, rooma aapatziyakari. Iroñaaka okimitaka maawaeni aapatziyariri ikemaatsitawentyari paashinipaeni rawijakotantyaari, eejatzi naaka nokemaatsitawentzimi, niyotaantzimiri paapatziyari rirori, rootaki nokimoshiryaaantari. Monkaataka iroñaaka.<sup>25</sup> Ikantana Tajorentsi: "Pineshironkateri maawaeni piyemijantzinkarite, eejatzi piyotaaperoteri nokoyiri". Ari iroñaaka niyotaakimiro. <sup>26</sup> Niyotaakimiro maawaeni kaari riyotawitani paerani ronampiripaeni Tajorentsi, eejatzi kaari riyoteeyawitani atziripaeni. Iroñaaka riyotakaakaero aaka eejatzi maawaeni paashinipaeni aapatziyariri.<sup>27</sup> Iroñaaka ikowaperotaki piyotero imatakaakimiri; okameethaperotziroña. Eeroka kaari joriiyotatsi, omaanta ikamawenteeyakimini eeroka eejatzi rootaki kijokiro rowaperotantzimiri Jesokirishito pishireki, rootaki

piyotantari kameetha pijeekimotaperoteri Tajorentsi iinja.<sup>28</sup> Rirotaki Jesokirishito nokenkithatakotziri. Nokantziri maawaeni atziri: "Kyaaryoowa, pantzirokari kaari kameethatatsi". Eejatzi niyotaaperotziri irinta riyotaperotantyaariri riraga Jesokirishito, raapatziyaperotantyaariri kameetha. Eejatzi eeroka, aririka piyoperoteri, paapatziyaperotyaariri, ari pikimitaperotyaari Tajorentsi pikameethaperotanaki.<sup>29</sup> Rootaki nopomeentsiwenantzimirori, kaari noperawenantzimi. Eejatzi rootaki niyotaantakariri maawaeni. Imatakaakina riraga Jesokirishito, rirotaki shintsitakaakinari, itajonkawentakina nomatantakawori.

**2** <sup>1</sup>Nokowaki piyote nokantani nopomeentsitawentzimi nokenkithatakayiri Tajorentsi. Nokantapiintziri imatakayemiro kameethatatsiri, eejatzi nokimitakowentziri ayemijantzinkarite janta Raworisheeyaki. Eejatzi nopomeentsitawentziniri maawaeni kaari ñaana, nokantapiintziri Tajorentsi imatakayeri rirori kameethatatsiri.  
<sup>2</sup>Nokantapiintziri eejatzi imatakayemiro piweshiryaantyari, pineshironkatawakaantyaari. Eejatzi nokowaki imatakayemiro pikemaperoteri maawaeni rantawentzimiri Jesokirishito. Rootaki nokowakiri piyoperoteri Jesokirishito.  
<sup>3</sup>Paerani tee riyotawitarini atziri irira, omaanta iroñaaka ryoteeri rirori. Jee, nokowaki piyoperoteri kameetha. Rootaki nakanantakimiri.

<sup>4</sup>Omaanta eenitatsi paashini atziripaeni rinashita riyotaantzi. Kyaaryoowa, ramatawiteetzimikari, rootaki niyotaantzimiro maawaeni iroka.<sup>5</sup> Kyaaryo, tee notsipatowitzimi, omaanta osheki nokenkithashiryaaakimi. Niweshiryaawentakimi kameetha pijeeki. Kyaaryo, pineshironkatawakaaka, eejatzi eekiro piyatatzti

paapatziyaperotari Jesokirishito, rootaki niweshiryantaari.

### Kijokiro poyeri Jesokirishito

<sup>6</sup>Rooma paerani paapatziyakari Awinkatharite Jesokirishito, rootaki rowawijaakotantakimiri. Rootaki iroñaaka, eekiro piyaatatzi paapatziyantariri apatziro irira: maawaeni kitejiriki panteniri oetarikapaeni ikowakaakimiri. <sup>7</sup>Noshiyakaawente-miro: rowaga pankirents, aririka oparithaperotaki inthomaeki kipatsi, rootaki oshoohantari kameetha, eejatzi oshintsitantakari. Eejatzi pikimitanakya eerori, kijokiro poyeri Jesokirishito. Apatziro pikenkithashireeri, ari imatakayemiro kameethatatsiri, eejatzi ishintshiretakayemi. Pikantatyeyaaani pikemijantaperoteri, rooma rootaki riyotagaetakimiri. Aritaki pikantya, eekiro piyaatatye pipaasonkiteeyerini Jesokirishito, tema ineshironkaperotakae.

<sup>8</sup>Omaanta eenitatsi paashini atziripaeni inashita riyotaantzi. Kyaaryoowa, riyotaantziro theeyaantsi, rowaga maawaeni ikenkithashiryari rirori eejatzi maawaeni riyotashitawitari: rootaki riyotaantteyawitarini ichariniiteni, itaperotakaworini ijekini. Ramatawitzimikari. Eero paapatziyari. Tee riyotagaero ikantaperotziri Jesokirishito: tema tee ikowakayimiro paapatziyari.

<sup>9</sup>Inta okameethatzi paapatziyari irira. Paerani ikimitakae awatha aaka, omaanta itajorentsiperotakiroña, ashi royo. <sup>10</sup>Eejatzi eerori, aririka kijokiro poyeri, paapatziyari, ikantyaani itajonkawentapiintemi, eero powashirronkaantaroña, inta ipashitzimiro maawaeni koetyeemotzimiri. Ipinkathariperowenantziroña, ranaakoperotziri maawaeni paashinipaeni jewatawita-

chari. <sup>11</sup>Paerani ikantzini Tajorentsi itotonateeyani ishiramparitantarri joriyyopaeni, rootaki riyotantakari atziri raapatziyakari Tajorentsi. Omaanta iroñaaka aririka paapatziyari Jesokirishito, inashita ikowakayimiri. Kaari pitotonatantyaawo. Iroñaaka kimiwitaka pitotonatakiro, omaanta rowameethatakimi pishireki pipakaantaaawori kaari kameethatatsi pantzirini, iroñaaka eero pikoyiro pantapiintero. <sup>12</sup>Eeroka ikaawoshitanteetakimiri, kimiwitaka itsipatakimi Jesoshi, pikamaki eejatzi kimiwitaka romonkeetakimi omookinta. Tema Tajorentsi ipiriinteeri Jesoshi, eejatzi eeroka kimiwitaka ipiriinteemi. Tema paapatziyakari riraga Tajorentsi-pero, riraga piriinteeriri Jesokirishito, rootaki ipaashinitakaanteemiri. Iroñaaka tektsi pikanteeyaa pantero kaari kameethatatsi, rooma kimiwitaka pikamakitzi. <sup>13</sup>Paerani okimtzimotakimi tee pañi, tee pikenkithashireerini Tajorentsi; inta pantapiintawitawoni kaari kameethatatsi. Tee piyotawitarini riraga Tajorentsi. Iroñaakkaya ineshironkatakimi, tee ikenkithashiryagaero kaari kameethatatsi pantawitarini. Rowameethatantakimiri panteero kameethatatsiri, pikimitakari Jesokirishito. <sup>14</sup>Paerani osheki apomeentsi-wentawitakawoni rojankinarini Moesesshi awijakotanyaarimi, omaanta tee amonkaatzironi. Ayotaki eenitatsini kaari kameethatatsi antzirini, rootaki aatantyaarimi paamarikinta akemaatsityawomi. Omaanta ikamawentakae Jesokirishito koroshiki, rowawijaakotakae. Iroñaaka eero apomeentsi-wentawo ironta jankinarentsi awijakotanyaari. <sup>15</sup>Paerani, ikamantari Jesokirishito koroshiki, riytakaakae tektsi ikantee rowashironkae riraga iwinkatharite maawaeni kamaari eejatzi maawaeni pinkathatziriri riraga

paashinipaeni kaari iñagaetzi.  
Ithañaakowentakae Jesokirishito, eero  
ishinetziri irintapaeninta ranaakotee.

**Eero pikenkithashiryawo  
riyotaawitzimiri atziripaeni**

<sup>16</sup>Tee okameethatzi ikijantemiro  
atziripaeni oetarika powayitarini eejatzsi  
pimirityayitzirini. Eenitatsi osheki  
kitejitsatsiri rinashitakayitakarini  
joriiyopaeni imakoryaanteeyarini.  
Rantzironi: maawaeni ojarentsi,  
maawaeni kashiri eejatzsi maawaeni  
saawaro. Teerika pimonkaatziro eerori,  
eero pishinetziri ikijawentemiro.

<sup>17</sup>Paerani ikantani rametapiinteeyawoni  
joriiyopaeni, ikenkithashiryantariri  
Tajorentsi, omaanta iroñaaka rareetaka  
Jesokirishito. Riroperotaki apinkathee-  
yerini. Monkaataka, ari okaatzi: eero  
iroñaaka apiitapiinteero rameteeeyarini  
joriiyopaeni. <sup>18</sup>Kyaaryoowa, eero  
pishinetziri riroripaeni ramatawitemi.  
Inashita oetarika riyotaantziri.  
Ikowakaemikari pikimityaari rirori,  
ikantzimikari: "Pipinkathateri ronampiri  
Tajorentsi pawijkotantyaari. Noñaakiro  
kaari iñaapiintziri paashinipaeni,  
¿piñaakiroma eerori?" Ikantakaaperota-  
shita. Eero pikenkithashiryawo  
ikantawitzimiri, itheeyashita. <sup>19</sup>Tee  
raapatziyaperotari riraga Jesokirishito,  
omaanta irira rirotaki Jewateeni.

Aakarya, aririka akenkithashireeri irira  
apaniroeni, kameetha aapatziyaari.  
Riyotakaakae, imatakaakae kijokiro  
owakiri ayemijantzinkarite antaper-  
tantyaawori ikowakaakaeri Tajorentsi.

<sup>20</sup>Ikamaki Jesokirishito, eejatzi  
okimiwitaka itsipatakimi pikamaki  
eerori. Iroñaaka eero pikenkithashiryawo  
riyotaawitzimiri atziripaeni,  
eero owawijaakotzimi. ¿Litaka patsipeta-  
shitantawori pantashiwitakawo ikantzi-  
miri irintapaenita? <sup>21</sup>Tee okameethatzi

ikantawitzimiri: "Aririka pikowaki  
pawijkote, eero pipampitziro okaatzi  
ithaawakari Tajorentsi, eero powari  
kaari ishinetziri Tajorentsi, eero poteeyiro  
ithaawakagaetari". <sup>22</sup>Tee rootaki  
ikantziri Tajorentsi. Rooma ryotashita-  
kawo atziripaeni iroka, riyotaashitzimiro.  
Pamine, riwetsikakaero Tajorentsi  
maawaeniowanawontsi owaeyerini.  
Aririka owaeyerawo, ari okaatzi, thonka-  
paaka. Tekatsi okantziro ashire.

<sup>23</sup>Aririka atzityawoowanawontsi  
aetakaashitakari ayotzi, aetakaashitakari  
aapatziyaperotakari Tajorentsi,  
aetakaashitakari tee akantakaaperota,  
aetakaashitakari ashironkaawentakari  
Tajorentsi. Omaanta atsipetashitakawo  
atzita. Aririka atzityawon  
owanawontsi, akantatyaaani akoyiro  
kaari kameethatatsi, tee akoyi  
amaejantero, eejatzi akantakaaperotaka.

**Ikanteri: "Kameetha pijeki"**

**3** <sup>1</sup>Paerani tee piyoteeyawityaarini  
Tajorentsi, piyaateeyenimi paamari  
kaari tsiwakanitatsini; omaanta  
ikamawenteeyakimini Jesokirishito,  
rowawijaakoeyakimini. Roojatz  
ipiriinanta; rootaki iroñaaka piyotanta-  
riri Tajorentsi, eero piyaateeyeeni  
paamariki, inta piyaateeyeeni jenokinta:  
janta ijeekinta Jesokirishito rakoperoki  
Ashitariri, itsipatapaari ipinkathariper-  
tzi. Iroñaaka eekiro piyaatatyte pikowa-  
perotanaki pijekaeyeni janta, pitsipa-  
teeyantapaeyaayarini. <sup>2</sup>Rootaki kaari  
apatziro pikenkithashiryantapiintawo  
tsika pikantyaari jaka jaawikika, inta  
pienkithashiryakotaperotyawo  
jenokinta, rowaga tsika ikanta  
Tajorentsi, eejatzi oetarika ikowakayimiri.  
<sup>3</sup>Okimitaka pikamaki, eero  
iroñaaka pikenkithashiryayiteroni  
jeekatsiri kipatsikipaeni, eero pikimitaa  
paerani. Omaanta rañaakagaemi

Tajorentsi, pijekantapaeyaari jenokinta. Ikempoyaaperotakimi, ikimitakaantakimi riraga Jesokirishito. <sup>4</sup>Iinja ipiyye kipatsikika Jesokirishito, riraga añaakaeyakaerini. Kameetha ipinkathariperotapaaki, akaateeyapae-rini apinkatharitapae aakapaeni.

**Eero papiitziro kaari kameethatatsi pantawitarini paerani**

<sup>5</sup>Iroñaaka kimiwitaka kamakimi omaanta rowañaagaemi Tajorentsi, rootaki kaariroña papiitanteeyaa wo kaari kameethatatsi pantawitarini paerani. Eeroka shirampari, eero pishirontawo tsinani kaari payi. Eeroka tsinani, eero pishirontari kaari piimi. Shirampari, eero pantatenkatawakaa pishiramparinkaki, pikimitakaantyaari riro tsinani. Tsinani, eero pantatenkatawakaa pitsinaninkaki. Eero pikowapero-tziro pantero iroka, eejatzi oetarika-paeni kaari kameethatatsi. Eero piñaawenatapiintawo pipiyotaperoter o pashaagawo maawaeni kitejiri. Aririka pikenkithashiryapiintero pipiyotero, pikimitakaantakawo rootaki pitajorentsite. <sup>6</sup>Osheki rantayitzironi atziri irokapaeni, rootaki rowashi-ronkaantyaariri Tajorentsi iinja. <sup>7</sup>Paerani pantapiintawitawoni, ashi poyironi. <sup>8</sup>Iroñaaka pipakaeroroña iroka: eero pikijawakaa, eero pimanintawakaa, eero powariperotawa-kaa, eero pikantzimatawakaa, eero powashiyakothatanta, <sup>9</sup>eero pamatawi-tawakagaeyani, kameetha pijeeki; rooma iroñaaka tee pikimitagaeya paerani, eero papiiteero pantawitakari, kameetha pijeeki. <sup>10</sup>Paashinishiretay-teemini, tema rowameethateemi Tajorentsi. Iroñaaka pikameethashirepe-rotanaki, pikimiteeyaa riraga Wetsikanakimiri paerani. Eejatzi maawaeni kitejiri tema rirotaki

amitakotzimiri pantero kameethatatsiri, eekiro piyaatatyе piyotaperoteri kameetha. <sup>11</sup>Tee ikenkithashiryakotero Tajorentsi tsika akantari: omawitya rirorika joriyyotatsiri, kaari joriyyotatsiri, totonatachari ishiramparitantari, kaari totonatziro, poñaachari paashiniki kipatsi, yotzinkari, kaari yotzinkari, pimantaarewo, kaari pimantaarewo, omaanta ikenkithashiryakoteeri aapatziyakaririka Jesokirishito riraga Awinkatharite.

**Tsika akantyaaka ajeekae aakapaeni aapatziyariri Jesoshi**

<sup>12</sup>Pamine, ineshironkaperotakimi Tajorentsi. Rowameethatakimi pishireki, rooma riyoakimi reentsitetzimi. Rootaki ikowakaakimiri ashi poyer o petakotantya, pikamintaante, eero pikantakaaperota, pitsinampashirete, eero peshiwenziro. <sup>13</sup>Poyaakotawaka-gaeyani: eero pipiyatokari kijawite-miri, inta pipeyakoteniri eejatzi pineshi-ronkateri. Rooma ipeyakotzimiro Awinkatharite kaari kameethatatsi pantziri. Eejatzi pikimiteri atziripaeni eerori pipeyakoteniri oetarika rantzimo-tawitemiri. <sup>14</sup>Iroka kameethaperotatsiri pantaperoteri: eekiro pintashirepero-tawakagaeyanakaani maawaeni. Ñaakiro, aririka anintashireperotawa-kaaya, aritaki aakameethatawakagaeyana-nyakaani maawaeni.

<sup>15</sup>Piweshiryaaawenteeyarini riraga Jesokirishito. Rootaki riyoakantakimir i Tajorentsi piweshiryaaawentyaari rirori. Roojatzi pikantyaani pipaasonkitaprinteri. <sup>16</sup>Pikantyaani pikenkithashiryaperotantyaawori iñaani Jesokirishito. Pikanteri riytakayemi kameetha piyotaawakagaeyantyaarini ikowakaakimir i Tajorentsi. Eejatzi pikantawaka-gaani: “Thame aweshiryaaawentyaari Tajorentsi”. Ikamintheeyakimini

Tajorentsi, iroñaaka pipaasonkiteeyirini. Pomampaawenteeyarini irira maawaeni pajankaneki, pomampaawaetya okantziri Iwaperite. Pomampawentyaari Tajorentsi, eejatzi pomampaakotaawo Ishire Tajorentsi iyotashiretakaakimiri. <sup>17</sup>Tee akowae-yeni ipashiwentakagaeyeeni Awinkatharite Jesoshi, rootaki nokowakaantaki-miri powameethatayiteroni maawaeni oetarika panteri. Okameethatzi akenkithashiryaaipiinteri, apaasonkiteeyantyaaririni Tajorentsi.

#### **Ikantziri tsikaakanterika atziripaeni**

<sup>18</sup>Eeroka tsinani, pikemijantaperoteri piimi, rootaki ikowakaakimiri Awinkatharite. <sup>19</sup>Eeroka shirampari, pineshironkaperoteri piina, eerokya pikijathatziro. <sup>20</sup>Eejatzi eeroka eentsi, pikemijantaperoteri piri oetarikapaeni ikantemiri. Eejatzi pikimitero piniro, pikemijantaperoteri oetarikapaeni okantemiri. Tema rootaki inimotziriri Awinkatharite. <sup>21</sup>Eenitatsirika pashi peentsitepaeni, kameetha pikemijantakayeri. Omaanta eero pikijathapaintziri, pikantakaashiryaaakenentari-kari. <sup>22</sup>Pimantaari, pikemijantaperoteri riraga amanantzimiri, oetarikapaeni ikantzimiri. Eero pamatawitziri: omawitya eerorika raminimi, omaanta kameetha pantawaeteniri. Pipinkathatziririka Awinkatharite, ari pikyaaryoo-wenteniri rirori kameetha piwaatorote. <sup>23</sup>Oetarikapaeni panteniriri, pikyaaryoo-wenteniri. Pikimitakaantyaari riro Awinkatharite pikyaaryooowentziniri, tee riro atziri. <sup>24</sup>Piyoperotaki pikyaaryoo-wenteniri Awinkatharite Jesokirishito, rirotaki pinatemini iinja, rañaaperotakagaemi janta Tajorentsikinta. <sup>25</sup>Omaanta riraga antapiintzirori kaari kameethatas-i, ari rowashironkaakiri Tajorentsi.

Oetarikapaeni anteeyakirini, eenitatsi ikanteeri aaka iinja, tekatsi akantya amatawiteri.

**4** <sup>1</sup>Eeroka antawaetakaantatsiri, pineshironkateri patzirite, kameetha pipinateri. Eero powashironkaashitari, kameetha pijeeki. Rooma piyotzi ijekki janta jenokinta Piwinkatharite, riytaki maawaeni pantziri.

#### **Pikenkithatakaapiinteri Tajorentsi**

<sup>2</sup>Pikantaani pamanapiinteri Tajorentsi, maawaeni kitejiri. Pikenkithashiryaakopero-tyaari oetarika ikantziri, eejatzi ikoyiri, eejatzi pikanta-piinteri: “Ariwee Pawa, paasonki”, rooma ikameethaperotaki. <sup>3</sup>Rooma nokamantapiintziri atziripaeni tsika ikantyaari rawijakotanteeyara, rootaki romonkyaatteetakinari jika omonkyaa-gamentotsiki. Pamaneri Tajorentsi ramitakoeyenani nokamanteeyerini paashinipaeni atziri tsika ikantakaeri Jesokirishito rowawijaakotantakaeri.

<sup>4</sup>Pikanteri imatakayenawo kameetha nothotyeeniri atziripaeni, ikemaperotantyaawori. <sup>5</sup>Eejatzi aririka pitsipatyari kaari aapatziyariri Jesoshi, nokowaki kameetha pijeeki, eero pipashiwenta. Eejatzi kameetha piyotagaeyerini, eero piperashiryawo. <sup>6</sup>Aririka pikenkithatakayeri, pineshironkateri, kameetha ikemaperotante-miri. Eero poñaashirenkiri piñañaatziri. Aririka rojampitemi oetarika, piyote kameetha tsika pikanteri pakeri ikowantaperotyaari rirori raapatziyari Jesoshi.

#### **Ikenkithatakotziri Teekiko**

<sup>7-8</sup>Iroñaaka notyaantemiri Teekiko, ayemijantzinkarite nonintashireperotziri. Ikitakina, ikyaa-ryooowentziniri Awinkatharite oetarikapaeni rantziri. Ikamantapaakimi tsikarika nokanta

nojeekaki. Rootaki notyaanantyaariri, piyantyaaari tsikarika nokanteeyarini jaka, eejatzi nokowaki riweshiryaaakyem. <sup>9</sup>Itsipatanakyaari irira Oneeshimo, poñaachari piipatsiteki. Rivotaki ayemijantzinkarite: ikyaaaryoo-wentziniri Awinkatharite oetarikapaeni rantziniriri. Nonintaperotziri. Ari ikaate apite kamantapaakimini maawaeni oetarika awijeentsiri jaka.

**Riweyaantari riwethatyaaari  
korojaashijatzi**

<sup>10</sup>Eeniro jaka eejatzi Arishitaariko, riwethatzimi. Ikaatakina nokyaaryoo-wentziniri Awinkatharite, rootaki romonkyaaanteetakariri eejatzi naaka. Eejatzi riwethatzimi Marikoshi, riraga rirentzithori Werenawee. (Tema irika Marikoshi rirotaki nokamantakotakiri paerani. Nokantakimi: “Aririka rareeta-kyaa pinampiki, paakameethawakiri”). <sup>11</sup>Eenitatsi jaka eejatzi Jesoshi, iitachari eejatzi Jooshito, riwethatzimi. Rivotaki joriiyopaeni omaanta ikaateeyakinan nokenkithatakotziri Tajorentsi tsika ikantari reewawanantee. Eejatzi osheki riweshiryaaakaakina. Paashinipaeni joriyyotatsiri tee ramitakotana. <sup>12</sup>Eeniro Epaajagashi riwethatzimi eejatzi. Poñaachari pinampiki. Rivotaki ikyaaaryoo-wentziniriri Jesokirishito eejatzi. Ikantani ramanapiintziri

Tajorentsi imatakayemi pikimityaari, pikameethatanyaari, eejatzi pimatantyaawori maawaeni ikowakaakimiri. <sup>13</sup>Nokantemi: kyaaryo, ikyaaaryoo-wentziniri rirori. Eejatzi ikyaaaryoo-wentziniri riraga raworisheeyajatzi, eejatzi riraga iyeraaporeshijatzi. <sup>14</sup>Eejatzi riwethatzimi Rookashi, riraga aawinantsirsiri noneshironkaperotziri. Eejatzi riwethatzimi irira Teemashi.

<sup>15</sup>Niwethatari maawaeni ayemijantzinkarite janta Raworisheeyaki, eejatzi niwethatawo Niijowa, eejatzi niwethatari maawaeni kemijantapiintzirori ifaanai Tajorentsi janta opankoki. <sup>16</sup>Piñaanatawakiniri nojankinari maawaeni ayemijantzinkarite eerokakinta. Roojatzi pikanteri riraga raworisheeyajatzi ifaanatawakiniri maawaeni iyemijantzinkarite rirori. Eejatzi piñaanatawakiro nojankinatziniriri irinta. <sup>17</sup>Iroka pikanteriri Arikipo: “Pimonkaateniri maawaeni ikowakaakimiri Awinkatharite, eero piperawentawo”.

<sup>18</sup>Naaka Paaworo nojankinatakimiro nakoki: “Nowethatzimi”. Eenirona nojeeki jaka omonkyaaagamentotsikika, eero pipeyakotziro. Nokowaki ineshironkatemi Tajorentsi.

Ari okaatzi.

Naaka jankinateeyimironi:

*Paaworo*